

四庫全書

集部

欽定四庫全書

集部

韋齋集卷一

詳校官左中允臣允塘五珠

主事臣呂雲棟覆勘

覆校官中書臣康儀鈞

校對官中書臣吳裕德

謄錄監生臣宋學濂

欽定四庫全書

集部四

韋齋集

別集類三 宋

提要

臣等謹按韋齋集十二卷宋朱松撰松字喬年別字韋齋朱子之父也政和八年同上舍出身官終吏部員外郎以言事忤秦檜出知饒州未上請間得主管台州崇道觀滿秩再請命下而卒朱子作行狀稱韋齋集十二卷

行於世即此本也初刻於淳熙再刻於至元
又刻於弘治皆不久而佚康熙庚寅其裔孫
昌辰又得舊本重刊之傳自得序稱其詩高
遠而幽潔其文溫婉而典雅至表奏書疏又
皆中理而切事情雖友朋推許之詞然松早
友李侗晚折秦檜其學識本殊於俗故其發
為文章氣格高遠自得所稱亦未為溢美矣
考昌辰跋此集蓋與松弟樟玉瀾集合刊行

者今仍各自為集以存其舊朱子行狀又稱
有外集十卷今不傳矣乾隆四十二年五月
恭校上

總纂官臣紀昀臣陸錫熊臣孫士毅
總校官臣陸費墀

۱۷۰۰

۱۷۰۱

韋齋集原序

文章之工拙繫乎人時命之通塞存乎天天人之適相
合也為甚難是以古今負文章之名者未必得貴仕而
都公卿之位者又未必以文章顯也故吏部員外郎韋
齋先生朱公建炎紹興間詩聲滿天下一時名公鉅卿
交口稱荐詞人墨客傳寫諷誦如不及予少時學詩嘗
以作詩之要叩公公不以輩晚遇我而許從游間宿于
閩部憲臺從事官舍之一東軒夜對榻語蟬聯不休比晨

起則積雨初霽西風淒然公因為子舉簡齋開門知有
雨老樹半身濕及韋蘇州諸生時列坐共愛風滿林之
句且言古之詩人貴衝口直致蓋與彭澤把菊東籬下
悠然見南山同一闋板三人者出處窮達雖不同謂此
詩則可見其人之蕭散清遠此殆太史公所謂難與俗
人言者予時心開神會自是始知為詩之趣別去未幾
而公下世予既為詩以哭公因求其遺編伏而讀之愛
其詩高遠而幽潔其文溫婉而典雅至表疏書奏又皆

中於理而切事情迺喟然嘆曰公之於詩文可謂至矣
今世能言之士非不多也然淺則及俚華則少寔是無
他徒從事於末而不知其本之過也公幼小喜讀書綴
文冠而擢第未嘗一日捨筆硯年二十七八聞河南二
程先生之遺論皆先賢未發之奧始捐舊習朝夕從事
於其間既久而所得益深故發於詩文自然臻此非有
意於求其工也使其得通顯於朝廷施諸潤色而見於
事業必有大過絕人者不幸位不媿德雖兩入東觀三

為尚書郎卒不得以其所長發綺又不得年而歿天人
之難合也如此可不太息也哉雖然人定亦能勝天故
公之嗣子今南康太守熹能紹公之訓早踐世科而益
篤志於伊洛之學安貧守道深山窮谷之中者三十餘
年明天子用寵嘉之即其家拜二千石君懇辭不獲命
強起視郡事逾年而政成訟簡一旦走介二千里書抵
予曰熹先人遺文江西遂將刊行而未有序引冠篇首
先友盡矣不孤之惠誠有望於門下敢以為請予覽書

悚然追思東軒之集恍如隔世而緒言厯厯猶在公墓
之木既拱而予蒼顏白髮摧然其亦老矣愴歲月之不
留憮餘年其無樂為之感慨不寐者通夕而病憊廢書
筆力衰退文不逮意獨念自少至老遊南康父子間為
最久相知為最深得其父子之賢為悉故不敢以不能
為辭若夫公之詩文足以行後而傳遠豈待區區之
鄙言顧予蚤歲承誨迨老無所成迺得挂名集端以託
不朽其愧且幸為何如哉公名松字喬年韋齋蓋自號

云淳熙七年夏四月既望河陽傅自得序

韋齋集十二卷宋吏部員外郎新安朱公喬年之詩文
也河內傅安道為之序云公嗣子南康太守刻諸江西
性江西人也而未始見之蓋其板本亡矣旌德新學告
成之明年性遣校官袁祥求書新安時吳郡干文傳守
婺源廬陵曹汝舟為之賓佐性因寓書婺源曰朱文公
之書在天下所謂家傳而人誦之矣獨韋齋集四方罕
見婺源文公故里也必有藏此書者其為我購求之汝

舟以書來報曰干侯之治婺源也文公故宅與其先墓
之為豪右所奪者侯皆取而歸諸朱氏矣仍俾遠孫之
居建安曰勲者來掌祠事勲以韋齋集為侯獻侯聞子
之求書也亟以相授子其有以廣侯之意乎性受書歎
曰侯以州政最江東至于修復朱子祠宇墳墓則非俗
吏之所能為者而為之者惟侯能也而又不鄙我旌德
之人士幸惠茲文性不佞敢不承命乃為繕寫刻之學
宮竊惟孔孟之道至程子而復明至朱子而大明夫人

有一行之善一藝之美未有不本於父兄師友者而況
於道有以參天地之運學有以紹前聖之統者乎程太
中能知周子故二程之學繼孟氏韋齋能友延平故朱
子之學繼程氏則韋齋之書學者可不學乎竊窺韋齋
篤志於伊洛之學其視游揚羅李孰敢議其先後若文
詞字畫又於荊公蘇黃皆取法焉豈不以學之大有既
推源探本而極其端矣至于曲藝小伎亦莫不各有理
而盡其心焉不專一門而惟是之從也文公集群儒之

大成紹周程之正統而於熙寧元祐諸公之是非得失
則未嘗有所偏主焉豈亦本于家學而然歟記曰三王
之祭川也先河而後海或源也或委也此之謂矣故書
于篇目之末以就正于婺源云侯字壽道延祐初進士
高第累厯州縣所至有風績汝舟字德川以諸生推擇
為吏與性同郡相好也至元三年丁丑五月五日後學

廬陵劉性謹書

金匱正經名解

原序

欽定四庫全書

章齋集卷首

行狀 本貫徽州婺源縣萬年鄉松岩里 曾祖

振故不仕妣汪氏 祖絢故不仕妣汪氏 父

森故贈承事郎妣程氏贈孺人

父諱松字喬年以紹聖四年閏二月戊申生於邑里之居第未冠由郡學貢京師以政和八年同上舍出身授迪功郎建州政和縣尉丁外艱服除更調南劍州尤溪

縣尉監泉州石井鎮紹興四年召試館職除秘書省正字循左從政郎丁內艱除服召對改左宣教郎除秘書省校書郎遷著作佐郎尚書度支員外兼史館校勘厯司勲吏部兩曹兼領史職如故與修哲宗實錄書成轉奉議郎以年勞轉承議郎出知饒州未上請間得主管台州崇道觀滿秩再請命下而卒紹興十三年三月二十四日辛亥也公生有俊才自為兒童時出語已驚人少長遊學校為舉子文即清新灑落無當時陳腐卑弱

之風及去塲屋始放意為詩文其詩初亦不事雕飾而
天然秀發格力閒暇超然有出塵之趣遠近傳誦至聞
京師一時前輩以詩鳴者往往未識其面而已交口譽
之其文汪洋放肆不見涯涘如川之方至而奔騰蹙胥
渾浩流轉頃刻萬變不可名狀人亦少能及之然公未
嘗以是而自喜一日喟然顧而嘆曰是則昌矣如去道
愈遠何則又發憤折節益取六經諸史百氏之書伏而
讀之以求天下國家興亡理亂之變與夫一時君子所

以應時合變先後本末之序期於有以發為議論措之事業如賈長沙陸宣公之為者既又得浦城蕭公覬子莊劍浦羅公從彥仲素而與之遊則聞龜山楊氏所傳河洛之學獨得古先聖賢不傳之遺意於是益自刻厲痛刮浮華以趨本實日誦大學中庸之書以用力於致知誠意之地自謂卞急害道因取古人佩韋之義以名其齋蚤夜其間以自警飭由是向之所得於觀考者益有以自信而守之愈堅故嘗稱曰士之所志其分在於

義利之間兩端而已然其發甚微而其流甚遠譬之射
焉失毫釐於機括之間則差尋丈於百步之外矣又常
以謂父子主恩君臣主義是為天下之大戒無所逃於
天地之間如人食息呼吸於元氣之中一息之不屬理
必至於斃是以自昔聖賢立法垂訓所以維持防範於
其間者未嘗一日而少忘其意豈特為目前之慮而已
哉是時宣和之季士之於世至是已無可言者矣旋屬
靖康之變中朝蕩覆公在尤溪方與同寮燕集忽有以

北狩之間來驗者公聞震駭投袂而起大慟樂絕既而
建炎再造王室漂搖未有所定寇賊縱橫道路梗塞固
不假於傳求幽達以是困於塵埃卑辱鋒鏑擾攘之中
逃寄假攝以養其親十有餘年以至不從算商之役於
嶺海魚鰐無人之境則已無復有當世意矣會詔出御
史胡公世將撫諭東南召公因謁見而說之曰古之為
天下國家者必有一定之計以為子孫萬世之業未有
俯仰依違苟度朝夕曾不為終歲之備而可以為國者

也今日廟堂之議固必有一定之計矣然未知其但欲襟憑江漢控引荆吳以保東南而已乎抑當克復神州汛掃陵闕據中原而撫三河也蓋嘗聞之不取關中中原不可復不取荆淮東南不可保唐惟不失關中故更三亡不失舊物而吳孫氏東攻新城西攻襄漢乃所以保建業其後桓溫劉裕雖能以江漢舟艦而入河渭然既得之而不能守則亦僅足以保東南而已然則天下之大勢可知已今進既不能以六師之重通道荆襄循

漢汚以赴興元結連拓跋控引五路東嚮以圖中原退
又不能移蹕建康治兵訓武北爭荆淮以為固守之訓
而但蹙處一方費日月於道途前不能有尺寸之利後
又無所保以為安未知漂漂者竟何如耶胡公竒其言
壯其策歸即以聞於朝而泉守資政殿學士謝公克家
輩亦露章薦公學行之懿不宜滯筦庫於是乃得召試
而發策者以中興事業之難易後先為問公即對言自
古謀國有得失而成功無難易蓋天下國家有至計而

國勢之強弱兵力之盛衰土地之開蹙不與焉唯能順
人心任賢才正綱紀則天下之事將無難之不易惟上
之人惜時愛日而亟圖之反覆驅騁辨說縱橫出入古
今証驗精博日未昧奏篇已上累數千言而文不加點
高宗覽而異焉趙忠簡公方以元樞受詔西督川陝荆
襄軍事欲奏取公為屬會太夫人屬疾不果既遂遭喪
以歸而趙公卒亦不果行也再召入對時上已用張忠
獻公之策進次建康指授諸將計將大舉以復中原國

勢亦小振矣公始進見欲堅上意以遂中興之業即奏
言曰陛下以聖哲之資撫艱難之運側身焦思累年于
茲而民困兵弱敵偽侵陵戡定之勲火而未集意者陛下
殆當抗聖志於高明而輔之以睿智日躋之學垂情延
訪蚤夜汲汲以求宗廟社稷經遠持久之計申明紀律
崇獎節義而又以民心為基本忠良為腹心則臣有以
知敵偽之不足憂而恢復大功指日可冀矣因論自古中
興之君唯漢之光武勤勞不怠自濟大業可以為法晉

之元帝唐之肅宗志趣卑近功烈不終可以為戒反覆
切至而猶慮夫計畫之間或未精審無以服衆心而成
大功也則又言曰人主操大權以御一世必其所以處
此者有以切中於理然後足以深服天下之心是以無
為而不成今萬幾之務決於蚤朝侍立逡巡之頃未有
以博盡謀謨之益使其必當事理以服人心謂宜畧倣
唐朝廷英坐論之制仰稽仁祖天章給禮之規延訪群
臣博求至計然後總攬叅訂以次施行則政令之出上

下厭服天下之事無所為而不成矣顧又嘗病士溺於俗學而不明君臣之大義是以處於成敗之間者常有苟生自恕之心而缺於舍生取義之節將使三綱淪墜而有國家者無所恃以為安則又奏言宜鑒既往之失深以明人倫勵名節為先務而又博求魁磊骨鯁沈正不回之士實之朝廷使之平居無事正色立朝則姦萌逆節銷伏於冥冥之中一朝有緩急則奮不顧身以抗大難亦足以禦危辱凌暴之侮則庶幾乎神器尊嚴而

基祚強固矣上悅其言而於光武晉唐之論尤所喜歡
明日以喻輔臣且論元帝肅宗之失而尤以元帝區區
僅保江左畧無規取中原之志為謗乃詔改公京秩仍
典校中秘書則當是之時聖志所存亦可見矣不幸適
有淮西殺將叛兵之變中外恫疑異議蠭起張公至為
解相印去而國論遂變至欲盡撤兩淮之戍還建康以
自衛公深以為不可因率同列拜疏言曰淮淝東南之
屏蔽昔人之所百戰而必爭者今皆幸為我有而無故

捐之以資敵非計之得也若彼乘吾之郤長驅以來不信宿而來至江津人心一搖則建康雖有甲卒十萬亦將無所施矣且其新民累歲安集亦既有緒今乃一朝而棄之使其老稚狼狽而南來丁壯忿憾而北去其失人心以貽後患抑又甚焉即以宿衛單寡必行今策則願毋庸盡撤而使合肥盱眙兩戍所留各不下三萬人則亦足以固吾圉而折敵衝矣疏奏不省而劉豫果數求援於金以乘吾隙議者方以為憂而金忌豫強將不可制

一旦執而廢之遂不暇以我為事不然則亦殆矣自是之後廟算低徊上下解弛北伐之謀日以益衰顧望中原坐失機會而明年車駕遂還臨安矣御史中丞常公同薦公恬尚有守可任大事因復召對公即抗言當今國論不過兩端喜進取之謀者既以行險妄動而及于敗為待時之說者又以玩日憇歲而至於媿二者不能相通而常墮於一偏是以成功不可見而均受其弊故臣嘗謂能自治以觀豐則是二者通為一說而無所偏

廢盖能夙夜憂勞率勵衆志則未嘗不待時而不至於
媿審知彼已必順天道則未嘗不進取而不及於敗謀
人之國者誠能如是以求逞於讐敵而猶不得志者臣
不信也然臣竊迹近事則夫往年江上之捷日者偽劉
之廢中原之釁可謂大矣而吾終未肯求所逞豈非以
行險妄動為不可以不戒而於吾所以自治其國家者
將益求其至歟今日之勢雖未至於危機交急亦可謂
迫矣謂宜斷自聖武深思昔人愛日之義憂勞庶政無

少怠忽凡事之故常非天下所以安危存亡者歸之有司而日與輔相大臣一心戮力明禮義正綱紀除獎政振媿俗撫循凋瘵之民淬勵士大夫而責之職業凡以求壯吾根本以成其內治者無不至斯以固結人心而徐圖恢復之計雖有志者亦不知為敵謀矣初劉光世守淮西御軍無法而寇至輒謀引避既正其罪而奪之兵矣尋有叛兵之變廟議反謂由罷光世使然更慰藉而寵秩之張俊守盱眙方撤戍時猶命分兵留屯而俊

不受命悉衆以歸朝廷亦不能詰公於是又言陛下有
為之志未嘗少衰而天下之事每每病於不立使中興
之烈未有卓然可見之效臣竊不勝憂憤而深惟其故
以為陛下誠能並進忠賢修明紀律懲陵夷委靡之禍
草姑息苟且之政深詔大臣號令所出必務合於天下
之正義而毋卽匹夫徇私之怨則威令必振國勢安強
雖桀驁之敵亦將歛衽而退聽尚何病於事之不立哉上
亦不以為忤特命除郎兼界史筆而公常猶以為此非

所以為薦論之本意再論上前言甚懇至然事已行不及改也公至史院會方刊修蔡卞所撰哲宗實錄而宣仁附傳實公所分所以辨明誣謗分別邪正者於體為尤重而公考訂精密直筆無隱論者美之其後顧亦不免頗為他官所竄易是以讀者猶有憾焉既而金人亟遣使來請和趙公以議小不合亦罷去而秦丞相檜始顛政事遂決屈己和戎之議矣金使名稱既不遜而所責奉承之禮又有大可駭者於是衆心共怒軍士至洶洶欲為變夜

或揭通衢指檜為金謀都人洶懼一時忠智之士競起而爭之公亦亟與史院同舍胡公珵凌公景夏常公明范公如圭五六人者合辭抗疏言曰金人方據中原吞噬未厭何憂何懼而一旦幡然與我和哉蓋其狃於薦食之威動輒得志而我甚易忍故常喜為和之說以侮我又慮我訓兵積粟畜銳俟時而事有不可知者故不得已為和之說以撓我耳蓋金人和使即秦之衡人兵家用之百勝之術也六國不悟衡人割地之無厭以亡

其國今國家不悟北使請和之得策其禍亦豈可勝言哉
而執事者顧方以為吾為梓宮母后淵聖天屬之故遂
不復顧祖宗社稷二百年付託之重而輕從之使彼得
濟其不遜無稽之謀而藉躡以逞將焉避之哉昔楚漢
相持之際項羽常置太公俎上而約高祖以降矣使為
高祖者信其詐謀而遽為之屈則自其一身且無處所
尚何太公之可還哉唯其不信不屈而日夜思所以圖
楚者以故卒能蹙羽鴻溝之上使其兵疲食盡勢窮力

屈而太公自歸此其計之得失亦足以觀矣其言之切
如此蓋出公與諸公之意而成於胡公之手檜雖持其
議不少變然金人狂謀因是亦有不得盡逞者論者莫不
壯之然自是之後邊備遂弛士氣益衰而興復之謀上
下皆以為諱正墮公等所憂撓我之計檜顧謂自以為
得上心始謀以次盡逐諸異議者公因是以數自求引
去而叅知政事李莊簡公又嘗欲引以寘近班以是檜
尤忌之固留不許及北使再至獨許歸我河南地公因輪

對又言陛下踐艱難之運十年于茲雖有大有為之志
而於天下國家所以經遠持久之計多有所未暇者今
者天啟戎心畫地數千里以歸于我此雖異時之變未
可以豫知意者天其以禮悔禍使陛下間於憂虞而大
有為之志將有所伸此萬世一時也然天下之事每病
於難立者正以嚮一夫獨見之言而畧衆口異同之論
是以謀始太銳而用計有未詳也願考漢廷雜議之法
自今發政造事陛下既與大臣謀謨於上又令卿士大

夫有忠慮者亦得以自竭於下然後總覽群策而裁處
其中將舉天下之事惟陛下之所欲為而無不成矣此
於前日講和之議猶欲三致意焉又念國步日艱人心
未服而天子無自將之兵諸道無典戎幹方之實二三
大將人擁重兵強不可令事蓋有不可知者則又數數
建言宜復武舉責實用必其洞曉韜鈴長於綏御者以
儲將帥之才下州郡選驍勇悉送行在以補周衛之缺
精擇帥守使蒐卒乘以壯藩維之勢亦皆當世之急務

久長之至計反復惓惓不能自己其於請建大學明人
倫以倡節義之風而勵苟渝之習則又平日之所深慮
而每言之所謂如人食息呼吸於元氣之中一息之不
屬理必至于斃焉者非若後來諸人承望風旨但以課
試文墨為粉飾太平之具而已也然而國是以定言無
所入由是公之求去愈力而檜之怒公愈甚十年春遂
使言者論公獨以懷異自賢陽為辭遜為罪而出之外
郡然公去未幾而果敗盟復奪我河南地悉其銳師數

道入如公所謂未可豫知者於是中外大震檜亦不知所為周章回惑至於視師之奏援引乖錯而不自知聞者莫不竊笑而深憂之幸而一時將卒猶有前日東拔蒐練之餘以故關陝順昌橐臯之師連戰大捷敵乃引退復議講解而梓宮母后始得南歸又如公等所論楚漢強弱之勢然檜遂掩已失而冒以為功公奪主權肆然無復有所忌憚矣公固不能復為之屈遂自請為祠官屏居建溪之上日以討尋舊學為事手抄口誦不懈益

虔蓋玩心於義理之微而放意於塵埃之外有以自樂
澹如也舊喜賦詩屬文至是非有故不徒作乃其文氣
則更為平緩而詩律亦益閒肆視諸少作如出兩手矣
然公自是不復起年未五十而奄至大故善人之類莫
不傷之其後十餘年間檜遂顥國柄大作威福諸與公
同時被逐之人大者削籍投荒小亦棄置閒散迄檜死
敗其幸存者乃復起用或至大官而公皆已不及見矣
嗚呼熹尚忍言之哉公性至孝事太夫人左右無違友

愛諸弟委曲將就有人所難能者與人交重然諾不以生死窮達二其心撫孤甥教之善學而經理其家事曲有條理人無間言接引後進教誘不怠聞人之善推借如不及至於邪佞嵬瑣簡賢附勢之流與己異趣則鄙而遠之或不忍正視其面至其所以施於吏治者亦皆果決明辨抑邪與正無所顧避顧熹生晚不及於聞見之詳故不得而記也晚既屬疾自知必不久而處之泰然略無憂懼之色手書告訣所善胡公憲原仲劉公勉

之致中劉公子翬彥冲屬以其子而顧謂熹往受學焉
其志道服膺死而後已垂裕後人不使迷於所鄉者又
如此云所為文有韋齋集十二卷行於世外集十卷藏
於家始時吏部侍郎徐公度欲為之序略言少日多見
前輩而自得從公及正平張定夫遊始得為文之法會
病革不及脫藁而今序則直秘閣傳公自得之文也其
論以為公詩高潔而幽遠其文溫婉而典裁至於表疏
奏又皆中於理而切事情亦為得其趣者公娶同郡祝

氏封孺人贈碩人其父處士確有高行碩人性慈順孝謹佐公事太夫人於窮約中未嘗一日不得其懽心承授內外姻親下逮妾媵僮使曲有恩意後公二十七年卒一男子熹今以朝奉大夫致仕一女子嫁故濬陽縣丞劉子翔蚤卒孫男三長塾亦早卒次埜將仕郎次在承務郎女三其婿修職郎劉學古迪功郎黃幹進士范元裕曾孫男五鉅鈞鑑鐸銍女九長適文林郎趙師夏餘或許嫁而未行也公卒之明年熹奉其柩葬於建寧

府崇安縣五夫里之西塔山而碩人別葬建陽縣崇泰
里後山鋪東寒泉塢然公所藏地勢卑濕懼非久計乃
卜以慶元某年某月某日奉而遷於武夷鄉上梅里寂
歷山中峯僧舍之北蓋公之詩嘗有鄉閑落日蒼茫外
尊酒寒花寂歷中之句嗚呼此其識邪不肖子熹追慕
攀號無所逮及竊惟納銘幽堂具著聲烈以告萬世蓋
自近古以來未之有改而公贈官通議大夫正第四品
準格又當立碑螭首龜趺其崇九尺刻辭頌美以表於

神道用敢追述其平生論議行述之大者如右以請於
當世立言之君子伏惟幸垂聽而擇焉謹狀慶元五年
十二月日孤朝奉大夫致仕婺源縣開國男食邑三百
戶賜紫金魚袋熹狀

欽定四庫全書

韋齋集卷一

宋 朱松 撰

古詩

睢陽謁雙廟

幽陵鐵騎殘中原列城東手天子奔天留巨孽毒梁宋
賊壘環堞如雲屯凶波滔天不可遏塞以東薪何足論
力憑孤墉阻其怒不爾荐食無黎元堂堂許張勇且仁
指揮羸卒氣愈振上書行在論賊勢想見憤色吞妖氛

人間貧賤客力避只有一死由來均二公就此得處所

至今日月名爭新遺祠突兀岸清洛英氣凜冽橫穹昊

尚聞餘蔭福茲土天假威柄酬忠勤布衣尚懸千古淚

肉食宜鑒當年因焚香再拜三歎息九原可作從斯人

謁普照塔

孤塔驚霄漢晴影金碧眩重來得寓目歸枕尾殘汴緬
懷何姓人哀禱傾淮甸是身如皎月有水著處現彈指
遍大川何止數鄉縣惟應應緣地聊爾共流轉顛危悔

斬馬善涉悟覓扇君看悔與悟只在一轉盼至人獨何
心示此禍福變當知夙緣定莫作邪道見哀哉衆生愚
積惡稔天譴云何一朝急賴此香火荐我來適燈夕寶
蠟明邃殿還揩客塵眼重睹浮壇面朝來塔上鈴告我
風色便平淮一回首岸草失葱蒨

曉過吳縣

舟行有嚴程越國常曉發雙櫓兀殘夢起坐窺落月人
家岸野水霧雨籠邃闔遙憐瑣窓人欹枕聽嘔軋

陪餘杭張無隅先生飲

先生結屋在人境門巷蕭蕭作冰冷紛紛入眼不入意
坐客千言不相領叩闌聞我倒屣迎重解舊榻塵埃生
向來妙處久不吐一挽天漢崑崙傾共說別來經世事
我言所向皆兒戲胸中磈礧不用洗便有清愁說無地
士林師範六十翁先生合在伯仲中願言終賜指歸處
為公敬作曾南豐

於潛道中

山行獻犧確理策扶欹危綠野三兩家一息知可期冉冉晴林端炊烟裊晴暉其民豐且樂恐是太古遺那知都邑間百索困鞭笞繁華今何有半作道旁羸

度芙蓉嶺

幽泉端為誰放溜雜琴筑山深春未老泛泛浪蕊馥娟娟菖蒲花可玩不可觸靈根盤翠崖老作蛇虯蹙褰裳踏下流濯此塵土足何當餌香節淨洗心眼肉餘功到方書萬卷不再讀晚歲窮名山靈苗縱穿斬菖蒲服之通神令人

聰明

健記

信州禪月臺上

玉峰點寥廓霄漢疑可梯玉水環城陰灔澦方拍隄層
臺擅二美吾策一時携何當蠟吾屐更欲照以犀塵勞
不相赦竟類窮途迷我生麋鹿爾不羨駕輶驪向來丘
壑懷語發人所詆長安黑頭公玉勒朝金闈山林出戲
言廣已無端倪誰收遮日手歸把耕雨犁紛紛塵土中
等是舞甕雞頗聞山水間幽子飯藿藜行當踐此語絕

境同攀躋

送深師住妙香寺元住雲溪

道人舍幽居誰管溪上雲此身自雲耳遑暇南北分頗
聞妙香山天花雨繢紛宴坐丈室間歷亂舊衲紋山前
路悠悠山後水汶汶應觀川途客念我奔走勤豈無香
火緣他年往相羣飽食跛鑪飯稀摘幽澗芹當令桃花

臺白社掩前薰

坐睡

坐火睡屢兀手失未了書清風脫然至心醒得我娛起
晉枯隙光了不移鎬銖云何短夢中萬境生須臾嗟彼
市朝子百巧營其軀安知非夢後過眼滅無餘至人欲
達觀那與世賢愚不須無言子同上崑崙墟

遊山光寺

寺藏兩山腹路轉百步陰登高試病脚掬冷清煩襟破
壁龕石刻歲月不可尋唯應查公石俛仰閱古今屋古
困枝柱摧頽力難任何當咄嗟辨嗣彼鍾梵音興衰豈

關吾得酒且滿斟歸路有溪月覽之醒吾心

送建州徐生

人羈天地間誰非一浮萍泛然偶相值便有離合情君
家武夷下歸路塵眼明我生愛山者夢寐秀色橫秋風
送客去把手更心傾亦逢山中人為我寄此聲

贈覺師

覺師儒門秀脫屣世故早那知軒冕味夙悟心已槁惟
餘章句習心境時相惱如人生於齊而即楚鄉老雖遭

楚人咻微音或清好固無益生死亦未妨至道家山亦何有骯髒衣間寶叢林選佛塲一擲想盆倒云何戀故居俛仰待華皓他年空手歸子語吾為老幸分曹溪水萬刼付一澡

休寧村落間有奇石如彈子渦所出者宜養石
菖蒲程德藻許以餽我以詩督之

君家綠溪上岸曲溪成渦渦間石無數水蹙相蕩磨誰嘗掬而戲一一印指螺我欲往取之擁此菖蒲窯石罌

注新汲幽姿發清哦夫子許餉我往督書已多願言速
寄與起此泉石痼

效淵明

人生本無事况我麋鹿姿一墮世網中永與林壑辭此
行獨何事豈不為寒飢弱歲慕古人頗覺世好卑那知
齒髮邁終然此心違春風到山澤魚鳥亦知時吾行何
日休流目瞻長岐且用陶翁言一觴聊可揮

酬馮退翁見示之什

我家大江左江水日夜東邇瞻發源處迺在西南窮相
望邈異境正北一水通故令我與子迹遠心自同我生
寡所諧強顏紅塵中倦飛矯歸翮飢吟咽寒蛩獨欣得
吾子萬慮一笑空時時出秀句醒我如風松當知山澤
曜不鄙犀角豐彈冠寔伊始此生各飛蓬卜隣固未必
即事聊從容

戲答胡汝能

我生苦中狹與世枘鑿乖平生素心人耿耿不滿懷汝

能伯始後遊世如嬰孩相逢握手語便作墳箒詣時時
笑謂我如子患未涯執古以規今求合誠難哉涉世幸
未遠子車尚可回我介足怨忌君通絕嫌猜不見山巨
源雍容居鼎台不見嵇中散絕交自可哀賢愚心自了
短韻共一咍

謁吳公路許借論衡復留一日戲作

幽獨不自得駕言欵齋廬殷勤主人情投轄恐回車轄
亦不須投此去將焉如唯憂酒錢盡使我詩腸枯會合

曾幾何可復自作踈更當留一夕帳中摻異書

新秋

幽人無與娛耳冷百不聞新米熟未知但覺市酒醇滄
洲散秋色山水逾清新一醉不忍獨念我存故人

道中得雨

我行野田間吁嗟連數村千山收宿雨谿作黃梅渾漸
晉風葉底一洗龜坼痕餘功被行客稍壓旱塵昏

道中

驕陽火自殺一雨蕩龜坼田夫夢亦好飄隴已幽咽朝
來喜相語一飽心已決翻翻風葉亂娟娟露芒白去年
禾欲秀積潦滿秋澤今年豈堪旱束首就溝壑我生拙
謀口藜藿甘如蜜向來真過計憂民豈吾職赤子天可
憐嗟人獨何力何須事兒戲合沓來賀客稍欣新稻熟
社酒行可覓當同扶路翁醉歸舞南陌

陳伯辨為張氏求醉賓軒詩

前年谿上秋風時主人酒熟烹黃雞歸來醉倒睡便著

父老喚起牛羊蹊此生一醉寧易得未辨身為貴人客
征西將軍爾何人那用尊前驚墮幘鶴來閩越再經秋
聞道軒名涎已流懸知得酒推不去此客有轄何須投
今我正為奔走役空想題詩滿高壁若逢落魄姓因人
為問何時定相覓

書窓對月

天公自厭雨一夕開寒晴霜風淨曠野洪落有餘聲飢
鴉得林靜霽月繁窓生慰開睡眼色一洗空花橫故人

千里餘壺濁誰與傾遙知勸影孟共此通夕情今冬有
奇事三見非玉英明年谿上路誰餉雨中耕

宿野人家

夢裏滄波搖一葉覺來正受肩輿兀人家一宿晚可投
新席搗梧香更滑霜前糴徑收百畝稚子新能牧鵝鴨
我生本是箇中人挾策久矣猶能說

度石棟嶺

我行欲安適東馬踰山樊谷深不可瞬危磴爭猱猿坡

垞兩山間寂歷三家村茅簷青裙婦蓬髮薪烟昏敲冷
那可飲分我一掬溫郎樵晚未歸客至不與言不奉沙
頭卮肯投柳下門作詩配國風行者式其藩

用退之韻賦新霽

春泥宮幽步苔上屐痕少新晴一褰衣綠葉藏啼鳥方
塘灔宿漲古鏡窺清曉華顛忽自笑綵羽墮驚矯瞻言
雲中耕縹渺穹眷繞歸把東臯犁此念何日了

送金確然歸弋陽

昔我雲溪居送子雲溪漬重來問何時笑指谿上雲一
別四周星坐此世故紛衰顏兩非昔華髮粲可耘我纏
風樹悲終日無一欣子乃水菽憂尚此奔走勤對牀語
未終懸知便離分霜風吹客袂別意如絲棼子歸葛破
上去路接鄉枌歸夢尚隨子何當歎離羣

至節日建州會詹士元

嗟予身百憂佳節過倥偬客愁隨綫增歸思與灰動當
年從子日未覺百慮重高堂遠狀呼一擲有餘勇那知

客天涯相對寒骨聳歲月曾幾何髮絲今種種忍飢山
藥煮附煖地爐擁深藏斷往還衰病脫拜拱興言望鄉
闌雲物方鬱滃空餘相屬意盈酒火不捧

用前韻答翁子靜

客心既岑寂節物亦倥偬幽籬菊初暗深壑梅已動古
人傲尺璧顧謂寸陰重欲從夫子遊掣肘愧不勇松高
節磊砢老格清聳當知山澤臞誰羨將相種一官戲
人間叢書以自擁微言聞緒餘三嘆手輒拱青天本寥

廓不受雲霧瀰願言瞻清明茗盃不辭捧

微雨

端居深百憂况乃貧病俱天公頗相哀雨我蔬藥區曉晴新青勺日薄生意蘇衛生固未必一飽行可圖故園天一涯茅荆誰為鋤嶧嶢歲云晚此念當何如

寄題叔父池亭

一壑久藏勝數椽忽開亭方塘蔭瓦影淨見鯈鯉行主人有嘉招轉柁失高城不知樂搖兀代舟上嶧嶢尊酒

酌芳綠園蔬煮柔青翩翩射鴨弓一笑飈綵翎那知海
隈姪斗粟忘歸耕餘生信萍梗歸夢識林坰漲水有回
波故鄉豈無情一醉會有日因之濯塵纓

贈謝彥翔建安人九歲異人與藥至今不食建
安有梅子真升仙處

我本世味薄寸田足自營年來荆棘盡稍有梨棗萌但
恐骨相凡未敢稀長生陳留達人後未覲犀角盈崔嵬遊
記三山幽夢徹九清爾來三十年但覺膏梁腥幽尋飯

綠髓默卧頌黃庭顧我塵土中深慰夙心傾仙人吳門
卒解后煩寄聲相期朝金闕寫駢何時征

考亭陳國器以家釀餉吾友人卓民表民表以
飲予香味色皆清絕不可名狀因為製名曰
武夷仙露仍賦一首

二年飲水閩中村忽見玉醴傾蠻尊涓涓醞醞灌熱惱
耿耿沈澁明朝曇旱塵火漲城市暗渴夢欲挽江湖吞
何人遠致雙鯉信知我來扣羅雀門不須邀月已清絕

尚恐慰齒當微溫要從華池汲真液豈獨玄髮嫋愁根
微芒已識投轄客賦媚似返當爐魂竒功誰續伯倫頌
妙意要與淵明論胸中我自有涇渭筆下君已傾崑崙
詩成寄與約他日飲君與我空瓶盃

久旱新歲乃雨

高田土可籠下田不受犁遺蝗憂挿啄况乃麥未齊赤
子天自憐溝壑忍見擠雨逐新歲來停雲忽淒淒莫辭
三日霖為作一尺泥汪汪既沒膝灔灔仍拍隄漸看蓑

笠出笑語喧畛畦我欲與寓目父老同攀躋此身羣萬
生擾擾舞甕鷄曾亦無樂求脫粟配羹藜永言故隴耕
老眼路淒迷好收斂板手鋤耰歸自携

春日與卓民表陳國器步出北郊

灼灼桃吐花濯濯柳垂縷芳菲挽人出春力乃如許嗟
予閑門客佳節過不數不因可人呼那得幽步舉客如
山陰勝詩作斜川語誰言一尊酒妙處合千古歸來讀
殘書耿耿霜月苦空餘流落心三歎非吾土

蔬飯

蕨拳嬰兒手筭解籜龍蛻荐羞杞菊開采斬烟雨外嗟
予飯藜藿咽塞舟沂瀨朝來二美兼一飽良已泰充腸
我誠足染指客應嘵平生食肉相蕭瑟何足賴王郎催
牛炙韓老憶鯨鱠俠氣信雄夸戲語亦狡獪我思魯顏
子陋巷翳蓬艾執瓢不可從一取清泉酌

戲贈吳知伯

條侯得劇孟吳楚坐可憚我知無能為失此一敵國偉

哉奇男子俠氣橫八極書生復何者骯髒老筆墨刺口
論安危事往竟何益匹夫嘯空野驚塵一方塞區區空
有意浩蕩洗鋒鏑何如吳王孫語輒面浮赤交遊得朱
亥負販鄙膠鬲腰間鐵絲箭上鏃紫塞翮笑指蛇豕區
滅此而後食諸公未備知欲荐恨無力明日我過君烹
牛呼社客當書游俠傳令子姓名白

送僧

空中世界紛河沙不知底處為天涯乾坤百億在指掌

觸處與子同一家云何猶作去來想千里一跌毫釐差
坐令契闊費星紀嶺雲欲寄山川遐撥眉相對此何日
丈室淨掃餘天花詩豪辨舌火投閣萬竅寂歷風無謹
為君遊戲出三昧妙處那復相聲牙往將妙響應空谷
一任飛錫凌蒼霞

招民表

清眠有味日方永襯纖妨人推不省疾草尺書招故人
一水未濟豈非命此身何啻千金直天下未可兩臂等

垂堂之戒其敢忘晚識風波失前猛天憐我輩少如意
曉起屋梁飛倒景側身鳥行溪上路遙知倚筇喚烟艇
信眉相對真夢寐豈不惜此一笑頃莫談世事令舌強
快讀新詩頻首肯與君好惡真磁鐵失足塵途若為騁
北窓風月夜吞吐持此邀君共幽屏淨洗多生內熱塵
更有僧廬千尺井

秋懷十首

秋風來幾日我髮白已多千林了未覺奈此一葉何宴

坐闋流光一眄寄庭柯寒虫獨何者唧唧夜自歌

塵埃地上臣天闕無力補夜久呵九闕嘗膽真自苦寄

牋東南風儻得蜚廉許尚當求妙斷君氏無乃魯

蒔蘭西窓下蕭艾病其根白露墮秋夕美惡兩不存寂
寂芳畹空離離幽佩昏物各信所遭此意誰與論

月林踈愈明露草淨可拭飛飛螢遞照軋軋虫自織移
燈檢書讀千載如經夕微言契夙心妙解失陳迹文章
事雕琢回視真兒劇世無揚子雲此理誰見直

宴坐自觀我中深抱天機從知月勝火胥失兔與蹄大
虛同一如浮雲渺何依悠然淵明心千載與我期

林臯一葉脫靜士最先知自抱茲獨悠然星氣馳乾
坤一逆旅鼎彝竟何為枯榮俯仰中兒輩浪自悲青雲
渺難必白髮不可辭得飽良已泰雨畦瓜芋肥

了翁卧淮楚德望臨一世憂時九迴腸醫國三折臂四
海一滔滔揚湯不止沸斯人倘可起姚宋何足繼
反身聖可作自恕惡易盈昨非往莫諫今是來足程幽

人歲晚栗樹者夷跖并慨然釋七歎諒知負平生

甘菊卧風雨枯荷暗池塘達人聽榮悴志士費感傷亭

亭岩桂花已作宮槐黃諒無青霞客誰與媚孤芳

江海有一士補袞抱經緯帝衣日月明袖手久不試九
關隔雲雨誰肯借一臂絃急而調卑此歎同萬世

和謝綽中觀瀾亭

方塘灔宿漲曲澗來飛湍光涵鬱藍天湧洞碧玉寬小
亭塵土外瓦影浮朱欄霜渚寫秋色烟林養漁竿佳人

秋霞衣皎皎明月冠欲濯且無塵隱几得妙觀海若眩
河伯等在蝸角端那知坳堂上孟水生濤瀾雲間謝公
子五字冰雪寒展讀勝圖畫經行記林巒九垓未遐遊
據殼諒匪安一到定何日眷焉抱長歎

寄題陳國器客膝齋

淵明乃畸人遊戲于塵寰南窓歸徙倚宇宙客膝間豈
不念斗米折腰諒匪安是非無今昨飛倦會湏還國器
青雲姿逸志追孔鸞曲肱數椽底尚友千載前規模琴

書室料理松菊緣心遊萬物表了覺函丈寬念君方適
越昔至誰云然要知丘壑志本出軒裳先瑣闈麗宸居
追飛不云艱回車莫待遠泉石聞此言

約金確然不至

門前北風裂我襦知君未能出僧廬忍看烟雨凍梅膚
南枝北枝香欲無可無一杯相煖熱道人酒熟不用沽
區區濡沫浪辛苦安得共似江湖魚

確然雪中見過

雨斷雪將墮天低雲可攀誰穿東郭履來歎山陰闕故
人金公子身宴心甚閑道機火純熟世味飽險艱一杯
不可緩輒此雙脚頑未忘膜外境忽湧胸中山白眼槩
六合誰云書生辱萬類宅天壤細觀真市闈攫金掩醉
眼倚門眩朱顏哀哉兒女態今古可笑訛坐令一世豪
偃蹇棲茅菅先生談天舌火挂屋壁間置之且默坐觀
我無所還紛紛造物機顛倒轉愚奸于我無所歎莫歎

簞瓢慳



韋齋集卷一

欽定四庫全書

集部

韋齋集卷二

三

詳校官左中允臣塘五珠
主事臣呂雲棟覆勘

覆校官中書臣康儀鈞

校對官中書臣吳裕德

謄錄監生臣朱學瀛

欽定四庫全書

韋齋集卷二

宋 朱松 撰

古詩

書僧房

陸續流泉自成句來擁紅爐聽山雨道人更有深深處
詰曲如珠蟻絲度几研無塵寒欲霧雕盤篆破孤螢吐
味如嚼蠟那禁咀茶甘未回君莫去

題蘆鴈屏

征鴻坐何事天遣南北飛蕭然如旅人無情自相依孤
葦吹欲折秋風不勝威冥冥一孤鶩空費弋者機寒聲
落烟渚相應不我違嗟我識此情手納空歎欷安知丹
青師落筆迺庶幾畫形孰不工畫意識者稀他時因吾
句購此千金揮

題臨賦軒

蒼山圍岑寂下有一水奔閑戶卧風雨束蒿翳籬藩寥
哉祇樹人心遠忘世喧此身自蘧廬長物餘此軒鳥語

幽夢斷香橫經帙翻未成借路行自要窺潺湲遠師淵
明意不愧靈徹魂月度了無迹風行偶成痕心境兩清
妙尺喙何由吞賦詩安所取碧雲未足論何當拂朱絲
窈眇絃吾言

荅保安江師送米

不見道人久江涯歲云除朝來食指動忽接送米書念
師折脚鐺五合未省餘雖無覆餗禍尚有乞食逋云何
憐孤客日受飢火驅未曾貸監河矧肯索蒼奴誰言斗

升意矯矯超萬夫嗟予事筆耕輕棄南畝鋤恩煩方外客此計良已踈何時事粗了歸葺五畝居生涯寄緯竹豈即非良圖不為泉壤虧願學江湖魚

陳德瑞饋新茶

空山冥冥雲霧寬春風好夢歇殘缸朝來果得故人信微凸而么犀銙雙貴人爭買百瓔珞此心兒女久已降坐觀市井起攘袂念之使我心紛龐領君此意九鼎重雖有筆力安能扛何時來施三昧手慰我渴夢思長江

次韻希旦喜雨

驕陽挾酷暑何啻虎而翼高田土可麤況乃耕與殖風
伯真可訟雲合吹復拆那知下土民糟粕配橡實古佛
棲巖隈旱沴豈吾責應緣賢令尹閔雨丐法力積陰暝
山谷流潤淒几格朝來賀客散置酒浣愁疾古詩成雲
外險句動潛蟄旋看蓑笠出競喜溝澗溢謹言令與佛
念我一何恙嗟我困蒿藜最覺民可恤何當問牛喘免
使訴魚失九關虎豹守懷此欲安適誰哉此心同吾飽將

何日

古風二首寄汪明道

紫蘭初出芽深壑終自秀骯髒蕭艾中不采則誰咎兒
曹遂紛華壯士保窮陋應知此調同萬世無先後

俗士白人眼從誰明此心不欲古人見訶我車轍深蕭
然江上廬客卧詩書林得句不相寄誰賞氣駿駿

建安道中

吾生意行初不謀泛泛何啻波中鷗攜家來作閩海夢

三年客食天南陬我先人廬在何許大江之左道阻修
奉新家有手足愛隻身歸掃先梧楸旋當來此營斗粟
南北顛倒無時休此心轉與世事左自作磨蠧將誰尤
安知不滿達者笑窮達一戲如觀優咄哉吾語亦已墮
且與造物同浮遊

書事呈元聲如愚起華三兄

隱吏朱墨暇飽眠北窓風時呼方外客逃暑尊酒中寂
寥杜拾遺四壁口不供坐取盤飧疑哀哉豈天窮何如

平生友磁鐵間不容每懷千里駕今作五斗逢吏行散
鳬鷺楸局收鸞龍共話十年舊事往如飛蓬浮榮真一
戲何者為窮通應須河漢語淨洗芥蒂胸僕夫適在門
客醉尊亦空更為後日約及此笑蕖紅

寄題起莘家義軒

貞觀盛德後餘慶未渠央舊聞閩海家欲縱燕山芳教
子嗣先訓開軒翼中堂地偏市朝遠几淨書簡香先生
陳太丘餘麋百憂忘弟子真羯胡不聞觸屏僵一變豪

俠窟遂成鄒魯鄉下車里門外他年看諸郎坐上紆素
髮詵詵立冠裳我詩自可絃請以侑壺觴

梅花

山深春未動沙淺水欲冰玉梅于此時靚粧畧無朋露
蘖欲的樂月枝挂鬚鬢儼如江漢女可愛不可陵他年
江南路曉粧犯嚴凝尋香烟雨中橫斜挿茆簾却數今
幾日癡如秋後蠅北嶺枝欲空誰與扶一登聊分窺水
影依我照字燈坐使惜花夢臨風脚騰騰昔如夢中蝶

今學柔下僧了知菩提長念起吾何曾

十一月十九日與仲猷大年綽中美中飲于南

臺

空山欲雪雲冥冥玉梅半開吾眼青此身垂欲走塵土
聊復舉酒看嶧崿折腰向人不知恥故園寄鋤在千里
金昆石友一開眉珍重道人相料理楚江東岸先人廬
竹君安否久無書歸歟何時應白首我食吾言如此酒

春社齋禁連雨不止賦呈夢得

歲豐農猶飢歲惡何可說哀哉半菽恨罪歲同一舌年
時旱塵漲臘盡不見雪青皇忽雨我萬頃麥苗活令尹
民父母溝壑思手挈祈年祓齋居有酒不忍設那知桃
李徑狼藉香泥滑芳意一如此坐恐及鶴鳩郊原佇開
晴出勞南畝饑秋成已在眼一醉宇宙豁更呼湔裙人
勸此側帽客和公斜川詩磨石鏡歲月

次韻夢得見示長篇

雉馴不因媒鳩暖自呼婦詩成桃李陰知是霹靂手簿

書我亦厭丘壑渠自有却憐支離疏飽食得薪槱俗夫
嘗世味甘苦半噦嘔知公超然處心跡兩無垢愁陰老
芳物蟲鳥故相誘浪蕪費收拾柔條可結操豈無我輩
人一醉開笑口那知市門底客倦枕兩肘眼高可人稀
命蹇亨運偶平生願執鞭見謂予小友細觀愷悌心宜
在帝左右却來塵埃中寂寥對五柳鶴音藏鵠羽正待
荆雞剖學政容窺譜問字當載酒虛名翻誤夢恐坐箕
與斗言詩終不稱永愧賦文玖

久雨短句呈夢得

身閑書有味吏傲俗不親小窓據物表掃盡心眼塵令
尹垂珠玉敲門喚行春作意向芳物吾車曾未巾愁陰
入病骨鳩婦聲亦嗔冥冥三日雨桃李迹已陳空餘深
枝間一一青子新穠芳殿春晚猶堪慰佳辰醉釀曉妝
靚芍藥醉臉勻日華簪嫋嫋風卮倒粼粼言當呼短舞
抵掌回雙顰年來得相從稍覺安沈淪豈不掛俗事察
公極清真眼中醉鄉路風味良獨醇流光不容玩尺璧

何足珍漓俗益可厭願言勤問津

牡丹酴醿各一首呈周宰

珍葉壓朝露無人羞欲欹春風醉香骨綽約不自持誰憐曲肱人一笑遣穠姿不言意可了君醉當勿疑

妝淡洗逾靚肌香薰不成皎然月露姿一笑午景晴聊移夢蝶牀相對戶不扃誰令風雨暴睡起春縱橫

次韻夢得淺紅芍藥長句

十日愁陰病不出卧看春歸無計惜詩翁遣送淮海春

衰眼慰開雲霧拆烟脂注臉勻未遍肉紅借酒生真色
了知造物著意深傾倒春工不餘力年來不顧漆消女
載酒非公復安適且將妙句寫餘妍欲立佳名付精識
一春頗困歌酒汙回首紛華三太息願言乞與洗心方
歸對爐香誦周易

宿禪寂院

夢中一葉搖江湖困睡不覺身藍輿眼明佛屋麗丹碧
瓦鵝鵠鳳凌空虛渡民日者困竒索半作赭尾相濡魚

鶼鷉數罟兩不置肯念竭澤明年無道人誰與辦此事
斤琢千指開渠渠頗疑如幻三昧力上方手攬歸吾廬
了知舌本法輪轉咄嗟檀施爭奔輸不辭割愛一念善
誰謂歲惡窮民愚書生袖手對溝壑力不能援心煩糾
事無大小成者少談說治亂何區區調卑絃急誠齟
鑿圓枘方尤闊踈古今罪歲同一口撫掌一笑皆愚儒

詩約范直夫遊萬葉寺觀瀑布

萬俟隱下吏夙尚本丘園身投攫金市藜書以自藩炯

然如孤月不受黃流渾要知句律工競病何足論我生
羣末俗涇渭非一源同心無楚越傾蓋如弟昆人生各
有役不暇捧一尊風蒲掛南浦念欲東南奔對牀定何
夕青燈照晤言懸知知詩處千尺銀河翻

次韻夢得見示之什

居楚求齊音美惡不同土喧逐俗物華羣復有佳處時
從玉璧人商畧窮萬古詩如粟牛戲誤得摩頂許望道
渺逾遠久生真暫寓忍持尺璧陰空作秋蟲語微言儻

傾倒河漢濯肺腑向來說詩口自此行可杜

送甌寧魏生赴武舉

生後與金人戰有功戰沒于邯

建安少年請纓客橫槊賦詩兩無敵辭家去作入彀英
氣拂天狼夜無迹廟堂尺箏鞭羌胡智名勇功付壯夫
引弓沒羽世自有敢聞上策當何如

陳仲仁止止堂

以我有限景逐彼無涯知失足踐畏途投身試危機舟
車日奔覆定無丘與夷萬古踐此轍嗟我與誰歸仲仁

古靜者懷璧照褐衣名途嘗一戲回首羞前非心如得
坎水不受狂風吹功名憂不免當復定所之請觀本無
作今復止者誰築堂市門側著書園不窺蓬蘽深一丈
圖書周四圍時有好事人載酒問所疑攫金奮敏手倚
市誇妍姿回光時自照何者非吾師

送志宏西上

九州眼一槩餘子真瓊瑣嶽立培塿中喜此高峻峨如
公我輩人取友亦到我揮毫賦垂天風雨卷蓬顆相期

八表遊未覺夙心左解龜醉江閣酒面山月墮起瞻帝
鄉雲感歎不成坐何須飛霞佩自辨凌風舸瀛洲渺溟
渤萬里一掀簸緘詩寄天涯秉燭對新火那知市門仙
斗祿事么麼空餘腸九迴上疏何日果

有懷舍弟逢年時歸婺源以詩督之

木落天未霜君歸定何時相思如驚鶴中宵未安枝夢
中見阿連鏘然詠新詩寤驚衰葉翻謂是步屧移攬衣
下中庭風露浩森瀾遙知客衣薄歸來一何遲平生短

檠燈相對忽解頤萬古一舒卷佳處良在茲是中及物
心上與稷契期援古以自例自笑無乃癡夜叉叱九闕
側足不敢窺坐令一寸心日抱二柄疑遲君商畧此恐
得兒輩嗤況乃綠髮親倚門鬢欲絲豨膏非鳳喙車轄
無可脂再拜壽百分斑衣舞參差秋芳未云歇采采黃
金蕤萬鍾不足樂古人豈吾欺

九月十七日夜度蔡道嶺宿彌勒院

月出度松嶺露香菲羽衣肅肅夜氣清蒼蒼烟徑微川

光浴秋容蘿影挂夕輝
冰輪碾空闊飛轍無因依
擬拘星渚波恐觸天孫機
偓佺何時見沆瀣聊獨揮
未應青霞志即與素願違
稍休塵外軒憇此巖下屏
清吟寫萬籟妙想絕百非
不須河漢言盡解紛華圍
飛仙亦戲劇玄學乃庶幾
鰲山切丹極歲晚行將歸

遊鄭圃

城郭不去眼而得林壑娛
低回撫壯心欲吐無與俱
鏗然一枝筇細磴爭樵魚挽
衣徑與飲不省誰為吾

女貧苦難妍

女貧苦難妍士貧苦難高了知論此者不識一世豪此
身百斛鼎流俗欲手操寧當拾其中局促計所遭頗疑
有若人骯髒棲蓬蒿考槃一丘壑光景不可韜斯人不
我忘空復踰垣逃軒裳亦云華唾去如腥臊哀哉季毗
子擾擾冠猿猱恬無濟世心閔默死滔滔竭來事斗祿
俛仰身桔槔一官戲人間幾何非餐餧誰言眷此情擲
去輕秋毫區區欲騎士一哭嗟兒曹

谿南梅花

巉巉石逕鳴枯筇意行詰曲無西東心知幽壑梅已動
一枝寄我曾未蒙暗香橫路忽驚顧采蕊的礫蠻烟中
有如佳人久去眼邂逅相得情何窮蔬畦壓霜翠羽亂
已覺雪片棲芳茸嗟吾幸此來已晚攀條嚼蕊聊從容
玉仙遊戲下塵世絕艷一洗朱鉛空不知閨苑在何許
叱回風馭無忽忽溪寒沙淨迷俯仰坐待山月來朦朧
豈無尊酒相煖熱錦裘起舞如驚鴻仇池老仙羽化久

妙曲三疊餘仙風歸時醉倒不知一作成和明日來此誰能同

再和求首座

道人昔曳羃廬筇五老負雪溢江東犯寒貪覓玉梅句雖有衲被何曾蒙歸來苦雨熟梅子卷械深卧蠻烟中詩傳絕境忽入手置我鄉國情何窮十年不踏江上路漠漠海氣昏迢遞異鄉歲晚慰流落一笑賴此冰雪容嶠南絕唱誰敢和騎鯨人去塵寰空崑墟下視堪笑閨

雕琢肝腎愁忽忽那知幽子雲雨上風斤玉斧修瞳朧
讀詩令我一回首杳若目送孤飛鴻何時晤語折鎗側
坐聽萬籟號天風拈花特地兩顏解他時與子真參同

奉酬令德寄示長句

閑官屋舍如幽棲寒苦餘業償鹽虀忽聞鶴聲作破竹
尺書入手誰所齋交游勝絕似公少矯矯鸞孔依蒿藜
青冥側足在咫尺誰使狡猾捐其梯秋風溪上共樽酒
擺落羈束忘吟畦紅裳起舞意未足缺月銜嶺星河低

只今跌宕走塵土清夢往復無山谿新詩驚怪爛盈幅
筆力拘怒蟠虹霓遙知槃礴小窓底得喪已著一理齊
此生同困造物戲未覺與世誰雲泥雖無絕唱追白雪
賴有妙契如靈犀一笑從公豈無日挽袖相屬空玻璃
不須俗物敗真賞但覓佳處同攀躋

答林康民見和梅花詩

寒崦人家碧谿尾一樹江梅臥清泚仙姿不受凡眼汙
風斂天香瘴烟裏向來休沐偶無事誰從我遊二三子

彎磈曲逕一携手凍雀驚飛亂英委班荆勸客小延佇
酌酒賦詩相料理多情入骨憐風味依倚橫斜嚼冰蕊
至今清夢掛殘月強作短歌傳素齒韻高常恨句難稱
賴有君詩清且羨天涯歲晚感鄉物歸歟何時路千里
柁樓一笛雪漫空回首江臯淚如洗

上丁餘膳置酒招綽中德粲德茂逢年

我生無樂求畢願老葭莩誰今事斗祿飯糲羹不糴書
生亦可憐微物有先感朝來食指動膳肉豐咀啖恭惟

魯司寇道大長坎壠空餘祠千載不救陳蔡慘永言百
世師願學吾豈敢當飢不忘歌既飽復何憾安能如王孫
長物貯頤領急呼講肆人一醉捨鉛槧相携桃李徑歷
亂蹴紅毯言強三尺喙氣溢一身瞻平生超然處獨嗜
逾昌歎詩成持似君莫遣兒輩覽

用綽中韻送正臣正臣欲歸隱而無資故廣其
意以告識者云爾

華裾錦領烏紗幘氣蓋當年五陵俠胸中魄磊不可平

拂衣歸來抱長鋏
軒然寄傲楸枰間
長恨坐隱非雲山
相逢笑我眷微粟
我歸未可君何難
世人錢作牛吼音
誰能立談壽千金
空令擁鼻誦招隱
知君心在仙峰陰
故山自欲無歸期
作詩但擬淵明詞
却愁他日林下信
千里寄我唯當歸

秋懷六首

庭柯一葉失風挾涼氣
歸湛湛陂水清芙蓉脫紅衣
非無岑寂士句法妙玄暉
獨懷履霜戒德人貴知微

真儒六經學文字聊解紛長孺棄諸侯漢庭相公孫兒
口乳未乾妄作黑白分誰能領斯會事往風中雲

導江自岷山源淺觴可濫下集大小川千丈水府暗策
策井桐涼向向窓月淡後生抱奇志黃墨勤點勘

市朝富危機匹夫死憑河何如狎鷗子烟雨同一波行
藏各有趣不在相詆訶我師陋巷人千古冠四科

穿堵超玉繩影倒夜窓寂火雲一洗空月露清欲滴幽
人負痾臥起坐三歎息歸同對牀第晤語永佳夕

揜窓耿不寐道人亦無悰故山新稻香粥魚響枯桐夢
中信了了推枕聞西風少遲羣金壯歸轡與子同

逢年與德粲同之溫陵謁大智禪師醫四小詩

送之

丈室揜槐夏與君同卧病平生莫逆人裏飯誰見過蹠
躰起鑑井萬古寂不波觀心要知是造物如吾何

六年別故山松竹故無恙此身已天涯飄走復何向清
源老醫師砭儻出投杖勿辭一往勤挹彼上池漿

石梁跨蠻山永與方壺久憑君持一盃往醉濟川手遙
知相携處溟渤浸箕斗作詩問大釣猶有斯人否

山河我四大物我同一體誰為苦疾癢搔按不容擬多
生抱此念耿耿未云已那知知魚樂更有濠梁子

與陳彥時會華嚴道人偶書

屋頭烟雲屯屋下波濤喧團欒坐已久起扣丹霞門客
至苦舌強目擊翻無言元龍湖海士懷哉夙契敦清坐
鼎足峙妙語流潺湲君遊華嚴海貝葉手自翻此心於

身世鳥度空無痕笑我流浪中久披業識吞讀書談古
今綺語生禍根望道渺未見况乃躡其藩職卑困掣肘
見溺不得援未知造物心頗復哀黎元近窺顏穆意未
敢遽捨闕躬耕亦細事會要五訟園釋羈牛在牧駕鼓
馬伏轅居然見優劣不比魚熊蹻持問跏趺人一笑霜
眉掀相携妙峰頂暝色窺遠村解衣畧輩行班坐寥芳
蓀欲歸意未已幽徑相與捫蒼崖出玉醴不受瘴毒溫
願言同酌此我語庶不謾

書耕檻院壁

側身西來度千山列仙仙去空辱顏斗升自從應笑我
何苦語曲嬉塵寰歸耕無田仕難合疑此二柄首鼠間
摩挲崖石三歎息我心安得如汝頑

次志宏韻督成壽置酒

歸耕食吾言回首愧江水方爭楊子席誰置穆生醴鄧
侯傾蓋舊小寢荔枝桃李走書納咱我涎迸齧唇齒朝來
獨何事怒色劇染指雖微射鴻遊顧有捩手鬼平生談

天口得酒便鋒起年來病不觴但要謳貼耳真成畫蛇
足足就酒空矣樊川吐怨句想見紫雲美何時咄嗟辦
一醉吾亦擬尊沓聽群兒口實爭笑鄙

內弟程十四復亨歸省用綽中韻作二章送之
舅家今三世筆耕未逢秋後生抱奇志肯為鑿鹽留先
盧江遼城歸路柳暗洲勉哉倘有立離闊何足憂

讀書學經綸及壯吾已晚譬如抱宿春求適萬里遠留
君商畧此歸袖不可挽流光莫控搏力學副深懷

韋齋集卷二

欽定四庫全書

韋齋集卷三

宋 朱松 撰

古詩

三月十日遊報國院小軒頗幽勝為名曰雙清

仍書此詩

千峰收宿雨坐見空翠滴
携筇出城隅試此腰脚力
竹陰穿窈窕僧戶扣岑寂
小軒清樾底磐礴聊自適
闌然見幽禽百轉深拔隙
即此與晤歌絕勝眼前客
幽懷層

冰結屬頭不可釋忽如散春風回首無處覓天遊失六鑒
真觀了千息乾坤鼎鼎中指馬坐可一不知雙清老何
者為心迹持問跏趺人首肯復面壁山烟明欲合歸舸
几深碧此心除溪月向誰復識

次韻謝綽中遊報國寺詩

掩關味詩書青簡亦已槁相携出東城及此風日好僧
簷覆谿澗共取一樽倒眷此松桂陰不接車馬道懸慙
玩流光齒髮行且老諸公奠九鼎帝室欣再造優游客

我輩放浪事幽討念君東山姿文字富天藻風期在經
綸彈冠苦不早寧知如子雲白首太玄草

丁未春懷舍弟時在京師

狂賊送死河南北王事遙憐弟行役胡命須臾魚在鼎
官軍低回鷙將擊渴聞天語十行札尤覺家書萬金直
何時同秉江上犁萬里農桑吾願畢

五言雜興七首

側席憂宗周負疴頭岑岑又傳衢梁盜弄兵保山林渴

聞平虜詔鑿戶跋雷音欲舞恨袖短諸君獨何心

黃香卧講肆日蕪五畝園兒誦聲九雛未厭咽耳喧古來避世士或隱車馬門云何北窓底默默對幽謾

聖門出嵩岱領畧千兵岑久矣暖姝子蠹魚槁書林曾參一唯後曠古沈此音願君同鑽仰滿我初地心

丹白春事了灌木忽暗園卷書護岑寂幽鳥時一喧起携無事酒往扣常關門豈無素心人之子不可諉

讀書評世故自許了無猜忽然撫機會往往鑿枘乖時

難既可歎道大未易涯歸來臥看屋吾意亦悠哉

湛湛天宇清宛宛穹眷白投深得僧窓千障倚蒼壁開
卷與晤言炷香伴岑寂獨將萬里心收斂入尋尺

身輕客已去睡美體新浴南風吹好句厯厯韻松竹雖
云天耳聽擬以幽夢續不辭舉似人恨汝心眼肉

遊西峰院留別友人

兀兀掩關坐后土冒泥塗繁陰忽披猖懷哉歎離居眷
我二三子共此一日娛欣然忘華陋意行非始圖園竹

粉黏帶弄泉雲達裾共睹羊山棋不釣溫水魚野色一
以暝歸舟相與拏豈無軟脚酒新熟不用沽急景棄尺
壁中原瞻丘墟丈夫患不免低回竟何如安能逐兒輩
飛翔爭腐餘但憂著鞭子滯留嘲賈胡

飲梅花下贈客

憶挽梅花與君別終年夢掛南臺月天涯谿上一尊酒
依舊風卮舞香雪高情絕艷兩無言玉笛冰灘自幽咽
却憐造物太多事更要和鼎調人舌浮生蹤跡風花裏

鼠壤珠宮熟優劣且當醉倒此花前猶勝相思寄愁絕

次韻和吳駿卿

學道日已渝千時心同嬾同懷能樂人俛仰風雨散晚
得吳王孫抱釁職高翰由來清廟質不賦白石爛笑我
塵土中坐受微粟絆新詩中音會天律度絃管未能載
酒問但作焚硯歎况聞翻貝葉一悟了真幻文章迺兒
劇安用黑白判何時商畧此得酒不待勸

求道人自尤溪來三山出示同徐侯遊龍門洞

長篇因次其韻送之時以檄走諸隘

阿游陸沈久亦復太癡絕未成安一枝况乃辨三穴唯
餘愛山意如水必東折首鼠今幾年顧影愧瓊玦那知
龍門客塵底抱闕闖虛檐日偃仰蒼壁對橫堦拄藤危
蹬響濯足細泉潔束薪取奇觀滴乳當嘉設摩挲石蜿
蜒信矣耆舊說歎疑卷風雨凜若踐冰雪遠追神清遊
復作武陵別能詩有老休聯句媿前哲相逢快吟哦嘵
亹霏鋸屑三山今入手瀛海僅可啜崎嶇走林谷王事

煩此傑擬結汗漫期更待櫬槍滅

吳駿卿寄示和黃元廣詩多及古人為已之學

輒復次韵資一大笑兼簡元廣

四物覓安心駕言無停驅忽然休歇去本自一物無那
於前後際而有新故吾知津恨未達敢以偷自愚

君居泥自蔽隣客旅兩足詩成各超然不復念瓶粟應
憐市門客俯仰對流俗出言不嫵媚人瞋大于屋

我生非瓠瓜于世豈無情望道渺未見諒知負平生將

求桎桎獲奈何鹵莽耕飢壤聽造物吾願乃秋成

次韻鄧天啓遊南國

秋犬吠夷門誰能拊其背懷安壯士羞竊食替操未無
由一當敵鬱鬱嚼齒碎故人何自來適與芳時對笑我
塵土中効牢守闌闈城南出携手遠取韓孟配心期汗
漫遊目極次寥內舞雩追點也峴首畧湛輩豫愁君興
闌復遣我心憒歸來疑夢斷清境皎不昧哦君斜川詩
汲井沃枯肺願言荐清廟勿賦風雨晦

徐侯以詩送山藥次韻

山中白玉延貴壓梁宋價筠藍出輪囷了不煩造化因
傳競病句中的若神射頗念坐穩人鞍馬久不跨谿橋
梅欲動玉雪短枝亞何當同嚼蕊一醉山月下

次韻酬求道人

聽君話匡廬風月妙無價爐峰忽在前俛仰疑幻化新
詩未出袖光怪炯如射懸知得力處島何不足跨家山
為誰留鑄粥香糴亞我亦懷秋江波清鴻鴈下

求道人示詩粲然有江湖間道人風味蓋嘗得
句法於東溪可今以其韻作詩送之時將如瑞
峰期朝夕還吉祥云

癩可溢江濱覓句負光價君為東溪客伏鵠資妙化想
見箭鋒機相拄不停射伽陀入三昧湯叟欲凌跨韋齋
語清夜挂月松偃亞他年約相逢禪榻慎勿下

贈永和西堂道人宣和癸卯十有二月中休日

蒼山抱岑寂丈室掩虛白道人塵機斷宇宙一西壁是

心如焦穀浩劫永枯寂一句從誰聞投老承此力相逢
不相問未省誰主客咄去真俗人胡為來役役

彥時過永和見和拙句輒復次韻以發一笑

老諭不下牀胸次紛黑白彌明亦強項得句鼾負壁相
逢復何事一笑萬慮寂新詩追舊韻俯仰見筆力何時
折鑷傍鼎坐無主客區區竟何補斗粟真自役

甲辰七月二日宿永和寺用舊詩韻

湛湛天宇清宛宛穹眷白投深得僧窓千障倚蒼壁開

卷與晤言炷香伴岑寂了無魔嬈夢皎皎知道力嗚珂
綠槐影想見下朝客笑我守吳門心形等相役

寄陳蹈元

我生少所可靡靡世一律如君素心人指不三四屈久
與宵人遊歸卧常自失效尤起媿心阿意增羨疾低回
強酬酢高論形敢出緬懷叅同子蚤入伊洛室聞道既
先我論詩又竒崛縱橫談天口卓犖扛鼎筆勝我何足
云論交敢自必桓公肯見規寡過行有日書來約過從

一笑破蕭瑟新涼宜燈火永夜勘書帙豈無一尊酒少
促款語膝更呼小叢歌未怕官長詰跋子占騎氣千嶺
秋回鬱着鞭及清境灔澦月華溢

次韻張漕茶山喜雨

天公積憤何曾雪遑恤茶工貪攬擷無聊桃李因遲暗
白萬紅飛亂原本漏二字誰疏天漢下穹窿苦厭風霾昏嵒
嶺行臺使者掃雲手釀酒叢祠拜靈絕歸來一雨動三
日溝壑遺民起垂絕豈惟槍旌各呈露更喜筍蕨爭芽

茲明朝擊鼓萬指集雲蹬携簾穿曲折紅塵一騎天容
開顧渚蒙山坐銷歇帝觴嘗罷思苦口公如子牟心魏
闕金鑾諫舌夜生塵回首山中記同啜

沙谿口望梨山

衆山如連環平野忽呀口孤峰挿深雲氣壓萬培壘區
區何足傑落落終自負我行清谿曲鶴立倚筇火拂衣
竟何時塵土坐自垢長梯弄玉井竒字窺岣嶁心知不
能去照水顏甲厚永懷山中人獨立誰與友神交解此

意長嘯震林阜

寄仁王求首座

片帆西借東風力回首三山春一色何人孤嘯月中聞
知是無塵岩上客風山武夷之宗支千岩萬壑帝所規
天憐傲吏賜我履恨不與子相諧嬉問法年來定成市
藤蔓遙知腎衣袂手攀荔子約同嘗絕勝林間啄殘柿

汪彥允見和約遊東山作荔枝次韻

天工傾倒不餘力唯有荔枝香味色君家桃李要爭妍

腸斷髮絲禪榻客書生瘦道天所支煮茗誇妓非良規
腹飢眼寒君不忍著詩喚作東山嬉冰盤絳宴光照市
歸來香滿巫陽袂明日人傳玉蕊仙絕勝空賦青龍柿

止戈堂

高堂岩岩面勢尊洞見萬井開重門元戎務簡玉帳靜
緩帶酌客娛朝昏憶初餓隸起篁竹一笑千里來黥髡
將軍攬鏡媚巾幘何異搏虎驅狐豚只今休父八州牧
身佩重寄憂元元驚塵錯莫羽書密雖有美酒誰同樽

沈機且復長轡御憑憲何啻血面論樓船一夕飛渡海
漢家上將來天闕狂童束手赴烈火凋戈不汚妖血痕
坐譙飲至凱歌入船粟往哺遺民存五兵包裹高閣東
止戈新榜真成言便當頻與方外吏徙倚風月星河翻
幾年北鑰飛不守河濟逆氣腥乾坤知公快挽天河手
坐視黠虜方遊魂權輿閩越聊小試寧復失此淹遐藩
農桑萬里望公等願見四海無營屯

侏儒

侏儒飽官粟適市行勃窣但知隨衆笑了不見優拙暮
歸遭客問閨默羞齧古心知續鳬悲慎莫尤造物

中秋賞月

去年中秋雨野蘆淒薄寒驚塵暗一方客枕那得安起
呼對牀第攬衣步蹒跚握手仰太息宇宙何時寬今年
中秋月並海窺濤闊坐看鬱藍天忽湧白玉盤眷言雙
峰客倚閣念衣單亦復取樽酒承顏有餘歡天涯等牢
落世路方艱難且遵秉燭語毋為泣河歎停盃玩飛轍

河漢靜不湍癡兒亦不眠苦覓蛙兔看洲出暗潮落鬢
衰香霧溥佳句付惠連何時解歸鞍

記草木雜詩七首

月桂花

窓前小桂叢著花無曠月月行晦朔周一再開復歇初
如醉肌紅忽作絳褐色誰人相料理耿耿自開落有如
貧家女信美乏風格春風木芍藥瓊艷傾一國芳根雖
無恙歲晚但枯枮

萱草

水菽怡慈顏萬鍾亦土苴時從斑衣兒蓀萱北堂下穠
華夫豈少愛此入風雅紛敷翠羽叢絳英爛如赭諸孫
遠銀鹿采摘動盈把誰言壺中春在此眉壽岸

紫竹

新移紫玉榦羅列才十餘枝葉一何病意色慘不舒旱
火土膏燥抱甕愁僕夫雖無樵蘇厄苦欠雨露濡我來
侷魚蝦滄溟在階除月窓瀉水墨天風韻虛徐誰言居

無友此君良不踈三年為主人籜孫定紛如他時報安
否誰寄青泥書

茱菊

海上作重九菊操青蕊香近墟買茱萸枯顆出藥囊兒
曹記土風歎歎事祈禳老夫未免俗聊爾答風光災祥
理不僭此柄孰主張謠言眩末俗吾欲築長房

吉貝

炎海霜雪少畏寒直過憂駝褐阻關河吉貝亦可裘投

種望著花期以三春秋茸茸鵝毳淨一一野蘭抽南北
走百價白氳光欲流似聞邊烽急緣江列貔貅裁襦襯
鐵衣愛此溫且柔天乎未厭亂利厚人益媿誰知海濱
客獨歎無人訓

芭蕉

地齒不敏樹珍植何由暢廝根移芭蕉美蔭跂可望芳
心目卷舒翠葉忽張王偏工鳴秋雨踈密渺難狀霜風
一以厲狼籍坐惆悵誰言繾綣中秋子得佳餉網囊貯

瑞露厚味天所貺懷哉腊毒言節口畏生瘴

菖蒲

東山在眉宇未到心鬱紜流泉撞哀玉清冽生菖蒲聞
有嬋娟子棄家來結廬窈窕雲霧窓參差冰玉膚絕粒
餌香節仙姿清且腴邇來隐身去冷落愁臞儒靈方無
尤乞石斗移根鬚相看意已消何必見子都

海上

落日弄雲海闊風欲手攀秀色不可解西山如連環綺

懷避世人結屋棲辱顏眎世一蝸角笑憫觸與蠻我生
笑癡仙遂恬升斗慳尚餘詩書債幸此朱墨闊纓冠出
救鬪安得長閉關仙人形識此妄自憑愚頑

送祝仲容歸新安

歷亂百憂心漂零一涯天讀禮不盈尺眼萎坐自憐君
來訪安否春風柳吹綿篝燈語平生懶恍夜不眠那知
歲月度但怪冰雪堅感君懷親意使我淚貫泉高堂急
榮養躬耕恨無田筆端日五色氣壓諸生前聖門要鑽

仰至味研簡編經綸出緒餘文字忘蹄筌他年閒擊竹
妙契琴無絃此時一瓣香竟為何人然江湖多北風懷
哉歸袖翩刮目看奮飛此道更着鞭

次韻彦繼用前輩韻三首

餽歲

歲晚追土風獨甕誰與佐人心感流光臺餽屏竒貨鶴
豚取牢柵門戶隨小大去鄉二十年憶此但愁臥兒癡
元未識但索梨飣坐何時鷗識村莫作驢轉磨不須志

四方教子求寡過歸哉及強健老去煩剝和

別歲

舊歲已趣駕為我不少遲凡心畏增年而歲豈容追文
夫有雙屈宇落天南涯收功英妙年豪傑彼一時寧當
如秦越坐視瘠與肥隣翁意誠厚酌酒寬愁悲懸慙何
時忘祝我致好辭撫世非吾事諸公正扶衰

守歲

庭燎夜未央旌旗煥龍蛇九門一放鎖萬馬誰能遮亂

離憶舊事安眠夢無何目眩燈燭光坐厭兒女謹念此
亦土風雖癡不容撾更為盧白戲紛爭起橫斜故歲不
足計新歲莫蹉跎努力誦書史從人笑翁誇

奉同胡德輝八月十四日夜玩月次韻

我夢故山月蘿影垂秋光誰言九衢曉莽莽吹塵黃羣
公直道山晤語清夜央飛轍轉空闊積暑蘇蒼涼哦詩
中天律流光惜堂堂鷄肥社酒熟吾亦懷吾鄉
亭亭月初高河漢坐可憊病餘久制酒瀨氣兩爭先振

衣萬里風歸袖何時翩懷哉故山友共此今夕圓離離
雲飛鴻何意影沈川觀心要知是出處直悠然

巖桂花

開門驚積葉秋氣日以厲獨芳搖落中粲粲巖下桂幽
芳不自憐怊悵紛滿地未忍蹋殘英何以娛晚歲

中秋夜雨

秋雲定何心忍翳今夕月尚嫌微點綴况乃都漫滅他
日任氛霾數日望清澈倦投衲子窓竹雨聽驂肩對牀

不成夢有酒那能設螢飛矜意氣蟲語轉幽咽心知層
陰表皎皎玉輪潔何當凌倒景徒倚玩飛轍

夜坐

棲遲客異縣名氏藏丹丘希世非夙尚素餐愧前修日
耗大倉陳一飽寬百憂眷焉撫半生信亦無樂求蒙籠
小窓底圖史漫不收篝燈揩病眼昏花亂蚍蜉愚懦未
忘世撫事非所謀不如遂捐書卒歲以優游懷膠睨崑墟
濁浪排高秋知難有明訓吾其老鋤耰

秋懷二首

鏗然一葉脫中夜歎以驚及茲遂搖落風露漭難平晚
晚愁自滋淹留塞何營騰騰任天運庶幾得吾生

中郎章句儒失身狗邦仇一歎不自知邂逅死孤囚凜
凜南昌仙斗食身百憂渺然元始後滅跡不可求

園棊

投老一寸心獨立無攀緣兀兀不自聊愔愔誰與宣時
有素心人一枰奉周旋得雋非至數三捷亦偶然危思

寄方罿積威下虛弦驕矜不須臾奔北已可憐志士珍
短景顧謂璧可捐聖門未及藩遠道要着鞭緬想運甓
翁操具投長川自強聖所臧懷哉撫章編

談命

岑寂契心賞棲遲幸身閑却掃味道腴未厭藜藿慳火
絕子公書羞訪季主闕肯為空際塵起此胸中山歷翁
推始生邂逅盈酒間自今半運中且作尺蠖踰蕭蕭兩
鬢髮已白不復斑功名日已踈落落難強顏譬如坐穩


人正苦步作難夸毗付餘子彼哉謝追攀

吳江曲

吳江女兒白如玉花底紗窓傍谿渌玉簫春暖貼朱唇
故作陽春斷腸曲扁舟掠水去如飛不見嫣然一笑時
回首江城只孤塔向來一念復因誰

梨

一霜木葉紛紛妥園夫獻梨紅頰橢亦知胸次本清涼
且欲與君充釘坐



章齋集卷三

欽定四庫全書

集部

韋齋集卷五

詳校官左中允臣璫五珠

主事臣呂雲棟覆勘

覆校官中書臣康儀鈞

校對官中書臣吳裕德

謄錄監生臣宋學濂

欽定四庫全書

韋齋集卷四

宋 朱松 撰

律詩

解汲舟

上國經年客春流一棹波已醒離帳酒猶記客亭歌水枕殘歸夢霜衾擁獨噭蓬窓橫落月作意傍人多

淮南道中微雪

密密雲陰合斜斜雪態妍似欺春力淺故傍客愁邊宿

鳥投村暝寒梅抱蕊鮮無人命尊酒清絕裊茶烟

送沈昌時赴寧海令兼叙別二首

俯仰塵埃二十年天涯初此試鳴絃正緣五斗羞陶令
莫歎三江阻鄭虔饑吏誅求何日饜羸民凋瘵豈容鞭
故人便使來當路終恐勞公自挽船

午潮平處落歸帆已覺離情雨不堪轉手便成千日別
悲歌聊倚一杯酣波翻別壑聞車水青遍柔桑趁浴蚕
歸路春深風日美伴誰操筆賦幽探

西湖泛舟

望湖樓下照衰顏，羞見塵埃兩鬢斑。
風艇從看山轉側，烟堤儘逐水回還。
喚人歸去城鐘急，觸處相親嶺月彎。
不用新詩摹絕境，定知長到夢魂間。

和舜明晚雨

一雨平龜坼，層臺轉小涼。
吟羞東野窘，醉想謫仙狂。
濕翠生苔徑，餘清襲艾裳。
王郎不相顧，掃地靜焚香。

贈言命張生

俯仰塵埃的自羞
稍看寒餓復誰憂
小兒造物巧相戲
窮鬼逐人殊未休
我所不知煩子筭
世如無取更何求
服箱犯酒真么麼
那用區區問斗牛

東陽社日泛舟觀競渡

誰喚思家客來為
蕩槳嬉鬢華
羞照水雨意解催詩疊
鼓飛文鷁香鬟出
短籬醉歸真夢覺
猶憶湔裙時

熊積道桂軒

覓種老蟾窟
培根芹水傍
書燈移素影
詩筆帶餘香
家

計傳韋業孫枝繼都芳山川供秀潤蘭玉競輝光那把
攀雲手空持種樹方嗟無月腸句惡語汚君梁

宿延慶寺

浮雲過眼旋消忘惟有谿山意味長身健不嫌穿聾確
塵空那復戲滄浪林鐘喚客烟藏寺風葉鳴秋竹陰廊
一似雲谿醉眠處只應軟語欠支郎

贈僧

知有叢林特地過幅巾迎笑出岩阿杖藜同覓牛羊路

金匱要略 卷四
濯足來分鷗鷺波豈不倦遊貪斗粟坐令歸思動漁蓑
他年會有相逢日稍食吾言聽子呵

三峰長老送紙被

笑我布衾故分君楮幅溫尚嫌脰當枕端稱席為門敗
篋薪錢盡幽窓雪意昏寤驚雙脚暖猶恐錦鯨存

盆中梅花

兀兀天涯客依依雪谷花莫辭遮病眼相伴送年華勸
我三杯醻熏心一念邪幽香戀吟筆半墮墨池窪

月下

幽獨不自得出門誰識從滔滔我不即踽踽世寧容吾道固應爾何人此意同唯餘穿戶月照我一尊空

留別卓民表

末俗紛紛事不情天涯懷抱向誰傾漂流空度三秋日
邂逅來逢四海兄剪燭西窓驚睡夢對牀夜語話平生
滔滔世路方同驚何日相期問耦耕

寒食

粥冷春餳凍泥開臘酒斟故鄉空淚滿華髮正愁侵山
暝雨還住烟孤村更深誰知江海客浩蕩濟時心

延福寺觀酴醿

幽棲一壑無來轍睡起忽驚春已深踏青不愁漆消女
曳杖來尋簷葡萄林長條挽處雲籠袖幽佩歸時月滿襟
武谿回首醉眠地杳力一熏愁到今武谿昔寓學之地有酴醿極盛

寄吳及之

世事令人舌本強滔滔何處是吾鄉未成微服隱吳市

且可攜筇訪草堂欲買雞豚投近社少陪風月坐胡床
共將絕唱追韓孟一飲還須醈百觴

答卓民表送茶

攬雲飛雪一番新誰念幽人尚食陳騫第三生玉川子
破除千餅建谿春喚回窈窈清都夢洗盡蓬蓬渴肺塵
便欲乘風度片水却悲狡猾得君嗔

和人遊仙峰庵三首

千岩萬壑翠縈洄一洗衰翁病眼開落日多情留別嶺

秋空無地着浮埃雲閑出岫初無意松老參天豈願材
我是散仙君記取更鞭鸞鳳少徘徊

誰麾俗駕挽今回珍重山翁小徑開去覓雲峰攀碧落
下看沙刦壞飛埃掬寒露井消塵想擷翠筠籃富藥材
彷彿三生曾到此樓鐘重聽一徘徊

腳底千峰翠浪奔雲端掛此一豪身山河了了窮千界
物我紛紛共一塵浪起下方追日步恨非本色住庵人
他年八極浮遊遍來讀新詩迹未陳

寄金確然

金子卧空谷何人賦白駒僧斟三味酒客薦一囊書歸
夢寒應短詩腸饑自呼強穿東郭履來煮雪畦蔬

次韻菊坡

露挹秋英濕曉陰小坡新廝佇幽尋似欺蘭畹方披羽
聊對風危旋屑金采采達籬吟欲就垂垂壓帽醉難任
使君致主唐虞了三徑無忘此日心

蘆檻

手斂修蘆着檻栽使君公退幾徘徊想當風雨翻叢急
疑卷江湖入座來未辨松窓眠綠浦且將屐齒印蒼苔
種成桃李人間滿應念孤根首屢回

春晚五言寄夢得

美景足可惜殘春尤不堪晚英餘燕蹴熟顆墜鶯含歲
月蓬雙鬢生涯粟一顛唯思對公瑾把酒話江南

再答諸公

芳節坐晚晚客懷無一堪柳眠猶自困花笑為誰含風

揭拾遺屋塵生執戟麤聯詩賴諸友妙句壓城南

董邦則求茶軒詩次韻

一軒新築敞柴荆北苑塵飛客思清更買樵青娛晚景
便應盧老是前生千門北闕夢不到一卷玉杯心自明
冷看田侯堂上客醉中談笑起相烹

送仲猷北歸二首

一丘曾次有餘師空此淹留歲月遲黃墨工夫憐我倦
簞瓢風味要君知新詩落筆驚翻水俗學回頭笑盡脂

伊洛參同得力句還家欲舉定從誰

欲尋當日故山盟身世今如海一萍歸路上心真了了
愁根入鬢已星星挽衣共嚼東西酒折柳送行長短亭
念我知君回首處萱叢菖葉一時青

寄吳致一

相逢一笑兩忘懷夢遙親庭首重回世事難磨三尺喙
離愁都付一分杯秋生林薄歲時晚水落江湖鴻雁來
贊作新詩頻寄我天涯時對兩眉開

四月十五日上元道中

亂山身逐簡書來
梅子黃時雨未開
一葦橫斜風葉度
千灘艱屬雪成催
危機種種那容避
俗駕駿駿底未回
聊復浮遊隨造物
故園回首思悠哉

送黃彥武西上

門掩蓬蒿氣浩然
西風筆勢更翩翩
未忘大學蘊鹽味
時說定林文字禪
蘆笙風光傾上國
槐花心緒記當年
里門歸日車應下
置酒遲君沈水邊

林文挽詩

沈谿耆舊半丘墟猶有期顧隱市區未展武侯牀下拜
已傳顏子夢中呼門人會築三年室弔客誰留一束芻
歸卧九原應不恨何蕃聲譽滿京都

有懷黃元聲時聞在建上詩中所記建上舊遊
也

積雨山城久卧痾起看橫港漲晴坡空餘九尺鬚眉好
柰此一樽風月何懷抱故人長在念經行佳境想重過

東谿回首醉眠處為問紅蕖何許多

書室述懷奉寄民表兄是日得民表書

丈室無塵棐几橫吏休鳬鴛散無聲舞風竹影噭噭轉
紫夢鑪香嫋嫋清已笑榮枯虛白戲不須物我觸纏爭
故人剪燭西窓約知復何時詰此生

答人留別之什

家在大江東復東去君一舍碧流通那知臨水登山處
同寄飛蓬斷梗中愁絕杯中千里月夢縈江上一帆風

只今且作須臾意更典雲乘醉小聚

七月四日宿丹谿道中

日出霧芒重涼生風葉翻秋杭已照眼社酒欲香村牛
下草萊濕人歸園屋昏個中我不淺擾擾與誰論

求道人自尤溪來還冷齋有詩次其韻

五年沈水照衰顏谿上今誰獨往還身挿亂峰隨一錫
夢回蕭寺遠千間西風潮落擊音急斜日尊空醉袖斑
更覺難追詩力健大弨久廢若為彎

送劉道醇歸烏石

一塵避地本依劉
聞得更書始欲愁
舊德鐫碑在人口
歸裝載石壓溪舟
寄書莫忘青泥信
犯酒誰同黃菊秋
新閣詩增風月價
自應神物護銀鈎

胸中一壑故超然
耿耿羞爭倚市妍
萬事一尊陶令酒
羣兒滿世祖生鞭
欲投烏石農桑社
尚有靈山香火緣
持節重來慰父老
溪頭相送各携錢

題白鹿庵壁

鹿門龐老携客隱耳冷十年難與俱
螻蟻夢中求曩事芭蕉林裏見今吾
遊絲弄影分陰轉喬木摩空萬壑趨
香妙心清無一事不知何處是華胥

滔滔一世強留連頭上從渠歲月遷老子養生寧解事
小兒有口慣談天醉來莫負持螯手老矣終尋種玉田
若怪微吟漏消息九江誰識市門仙

與求道人同之福唐

縛屋雙峰雲一塢拋來伴我事幽尋風花蹤跡趨雖各

香火因緣情自深浮峽未興圓澤歎乘桴還有仲由心
三山他日記者舊鑿齒彌天無古今

次韻李堯端見嘲食蕨

真人官府未夤緣且向龍山作散仙春入曉痕催采蕨
雨翻泥隴憶歸田蔬腸我若枵蟬腹詩格君如擊鶻拳
筋下萬錢謀更鄙諸公飽食大官羶

次韻堯端試茶

龍文新夸荐緗羅園吏分嘗苦未多自目雲腴薺露井

坐知雪粒采陽坡
撐腸君要澆黃卷
愛酒渠方捲白波
我亦個中殊不淺
斷無蹤跡到無何

送友生

剥喙門前久未嗔
定知我輩不羈人
午窓喚起夢魂好
一語便知風味真
身嬰世網坐營口
心識醉鄉慵問津
忽先秋燕背人去
四角何由生客輪

贈范直夫

將軍競病詩成處
南浦春歸蘭玉叢
漸減心情身老大

久乘談笑路西東鄉關落日蒼茫外樽酒寒花寂歷中
且與寓公同放曠浩歌相屬倚秋風

招友生

雨收天氣欲清明猶有餘寒在粥餳馬隊客勤貪晝永
鱣堂人病想身輕讀書有味蠶鹽好對鏡無情夢寐清
欲話此懷須我輩一來蠟屐伴春行

辛亥中秋不見月

今夕九秋半心期負隔年勞生灰刦裏微雨客遊邊旅

泊正無酒陰雲遑怨天何時草堂月相對籍糟眠

次韻羅源謝成章作不烹鳴雞詩

彼美司晨族膠膠職効鳴為憐君子操寧乏小人羨恩
重棲時穩心危失旦驚未甘鳥轉夜聊學雁全生結客
觀酣鬪要君事割烹那知競辰子力學務時成

次徐謝韻還江公詩卷

大條祠官閑日月絕知聖處着功深榮枯舉世爭盧白
枉直何人較尺尋身比香山差得計詩看正始有遺音

應容下客遊東閣要話朱游夙昔心

次韻汪彥先見寄

北苑乘期恨昔年異鄉牢落夢江天約遊汙漫傳新句
許出嬋娟有舊緣種種鬟絲何計換搖搖心旆不勝懸
歸耕要伴君難老相與笞鸞作散仙

與吳昌國同遊靈水院二首

算舟吏散了無事與客意行初不謀飽看雲濤無空闊
欣逢泉石媚深幽西津未試補天手上界那知鞭鳳遊

剪燭他年憶真賞莫嗟身世尚沈浮

來往風流記兩翁天涯今作九秋蓬坐驚秀色懸眉宇
便覺仙峰入手中傲世真成漆園吏輸君不負北窓風
書生浪發新亭歎自笑尊前氣吐虹

贈吳昌國二首

居越與誰語得君寬我愁頗驚三日別更為一樽留食
藿有餘味泣河非所謀相看撫身世容與愧蒼鷗

憶我少年日遊君大父間諸孫嗟契闊雙鬢各斑斑未

覺歸愚晚俱嘗適俗艱絕知歸思急更覓玉梅攀

孔生示二詩答一篇

歲晚尊前一笑譁憐君孤憤老天涯諸豪雖識臨邛客
陋族難當闕里家會有益光求共隱不應牧犧但長嗟
青衫華髮春風裏擇婿猶堪駐寶車

寄江少明

龍卷風雲一鬢蟠不妨聊作侍祠官高情未許羣兒覺
萬事何須正眼看問道從公春信近談天容我酒杯寬

乘桴亦有平生意回首紛紛行路難

次韻劉仲高懷外舅家梅花

柯山月下嬋娟影前度劉郎餘故情詩成回首戀三宿
我亦惜花癡半生雁沈寒水苦猩長蟲蝕真詮章句清
西湖懸絕得鸞啄可但能專五字城

送景思奉祠之溫州

司祀名郎下紫宸王師載主尚時巡丕承配極威靈在
對越垂休命秩新幽夢想多春草句清江為洗涅衣塵

行觀前席來宣室可但從容問鬼神

次韻鄭德與歸舟中感懷

雨牛鳴地隔寒流病起相望客鬓秋聞道喚船歸別浦
坐懷聯策倚滄洲騷人空復驚搖落胡賈何須歎滯留
會擁蒙衝入河渭看君黃色上眉頭

李似表取告歸晉陵

酌酒掩歸袂繁陰殊未收心知非遠別自不奈離愁蓬
渚勦懷繫雲臺歸借籌端來閭闔路萬馬避前驅

致政宣教魏公挽詩二首

已自應無憾人猶歎不遭簪纓門已大湖海氣方豪舊
國牛磯外新阡馬鬣高流芳傳教子步武接夔皋
交蓋歲云晚向人懷自傾爭棋消永晝酌茗話平生轉
手便陳迹撫書增故情無由從執繩空想葵簫聲

劉氏挽詩

餘慶鍾蘭秀初占合鳳飛那知風不止遽作露先晞鬻
髦筵方撤齊眉事已非魂車春陌上空背夕陽歸

次劉彥仲傅茂先韻

強躡府廬從傅子立談江閣識劉郎一樽此地見眉宇
十載相思成鬢霜秋燈煜煜照清話夜浪翻翻吹客床
投名徑入農圃社老矣不夢天門翔

建安道中

肇確復肇確秋山殊未晴流年半羈旅此地幾經行雪
嶺今慵照茅簷欲謾營大鈞渾莫問流坎任餘生

送蘭廷秀之衡州

墻東新徑去年開二老扶筇便往來數面何曾三日別
離懷都寄十分杯客亭繫馬梅爭落官舍裁書雁欲回
秉執樞機有知己未須卜筮向蒿萊

商羊

異鳥來齊國仍依殿陛翔從容詢魯相物色是商羊欲
雨追童語懷山騷水祥民寧因備豫政美謝祈禳止異
爰居久鳴無垤鶴長願言蘇旱虐主上似宣王

次張演翁林元惠韻

朱門小駐使君車二老風流入畫圖但有觥籌供笑語
從教歲月上鬚鬚詩成樺燭留殘蠟客醉高歌叩缺壺
更起爭棋誇得雋不應局戲守邊隅

公相起犁鋤

帝室尊公相潭潭大府居從容調鼎鉉奮發自犁鋤弼
亮恢賢業班聯寇廣除艱難同耦日慷慨輟耕初厚幣
來莘野幽人出冀墟渴賢方仄席何計老田廬

章齋集卷四